



REPUBLIKA E SHQIPËRISË
KOMISIONERI PËR MBROJTJEN NGA DISKRIMINIMI

Nr. 478/1 Prot.

Tiranë, më 12.03.2025

V E N D I M

Nr. 57, Datë 12.03.2025

Bazuar në nenin 32/1/a dhe nenin 33 të ligjit 10221/2010 “Për Mbrojtjen nga Diskriminimi”, të ndryshuar, pranë Komisionerit për Mbrojtjen nga Diskriminimi, është regjistruar ankesa me nr. 260, datë 24.12.2024, e paraqitur nga znj. M.T kundër Ndërmarrjes së Shërbimeve Mbështetëse të Arsimit dhe Çerdhes, pranë Bashkisë Korçë, në të cilën pretendon diskriminimin të vajzës së saj të mitur M.T, për shkak të “aftësisë së kufizuar¹”, të dy fëmijëve të saj.

Në përfundim të shqyrtimit të ankesës, Komisioneri për Mbrojtjen nga Diskriminimi,

K O N S T A T O I:

I. Parashtrimi i fakteve sipas subjektit ankues.

Sipas shpjegimeve të dhëna në formularin e ankesës, znj. M.T, në mes të tjerash informon se: “Jam nëna e 4 fëmijëve, 2 prej të cilëve studiojnë përkatësisht në shkollën 9-vjeçare “Ismail Qemali”, në klasën e pestë dhe të gjashtë. Djali K.T, është në klasën e V-të dhe gëzon statusin e personit me aftësi të kufizuara, pasi vuan nga epilepsia dhe sindromat epileptike të gjeneralizuara idiopatike dhe dëmtimet e funksioneve trupore. Me të njëjtën diagnozë kam dhe fëmijën e tretë K.T, e cila studion në shkollën profesionale në klasën e XI-të. Pra kam 2 fëmijë që gëzojnë statusin e personit me AK. Në bazë të VKM 666, djali im që është në klasën e pestë është përfitues i kësaj burse, por unë ankesën po e drejtoj tek ju për vajzën time M.T, e cila edhe pse ka dy persona në familje që gëzojnë statusin e AK, nuk është përfituese e bursës. Vitin e kaluar dhe më parë vajza ime është trajtuar me bursë, kurse këtë vit jo.

¹ Referuar Vërtetimit datë 23.12.2024, të lëshuar nga Drejtoria e Kujdesit Social e Bashkisë Korçë, vërtetohet se K.T trajtohet me paaftësi me nr. dosje 375, në shumën 8739 lekë.
Referuar Vërtetimit datë 23.12.2024, të lëshuar nga Drejtoria e Kujdesit Social e Bashkisë Korçë, vërtetohet se K.T trajtohet me paaftësi me nr. dosje 122, në shumën 8739 lekë.

Në muajin nëntor për të dy fëmijët kam dorëzuar dokumentacionin përkatës pranë shkollës. Në dhjetor kanë dalë listat me emrat e përfituesve por emri i vajzës sime nuk figuronte. Kam kontaktuar me drejtoreshën e shkollës ku i kam shprehur shqetësimin tim, se përse fëmija im nuk është përfitues dhe përgjigja e saj ishte që nuk është në kompetencën e saj, por e ka Bashkia.

Shkoj tek Ndërmarrja e Shërbimeve Mbështetëse e Kopshteve dhe Çerdheve, (NSHMAÇ) takoj specialisten e këtij institucioni ku gjatë bisedës me të, shoh që dokumentet e vajzës nuk ishin hedhur në sistem. Pra nuk figuronte emri dhe dokumentet ishin lënë mënjanë. Edhe pse vajza ime ka vëllain dhe motrën e saj që gëzon statusin e personit me AK, ajo nuk ishte përfituese. Këtë shqetësim ia them dhe specialistes e cila më thotë që ka ndryshuar ligji dhe duhet të jetë nëna ose babai që gëzon këtë status. Ndërkohë tek kjo VKM nuk ka asnjë ndryshim me sa kam parë, është vetëm VKM 511, e ndryshuar prej disa vitesh dhe aty kjo pikë është e njëjtë”.

Subjekti ankues, kërkon nga Komisioneri për Mbrojtjen nga Diskriminimi, konstatimin e diskriminimit dhe përfitimin e bursës për vitin shkollor 2024-2025, për vajzën e saj.

II. Ndjekja e procedurës për shqyrtimin e ankesës nga Komisioneri.

Hapat proceduralë të ndjekur nga strukturat përkatëse të Komisionerit për Mbrojtjen nga Diskriminimi, paraqiten si më poshtë vijojnë:

Pas analizimit paraprak të ankesës, u konstatua se nga pikëpamja formale, ajo i plotësonte kërkesat e parashikuara nga neni 33/3 të ligjit 10221/2010 “Për Mbrojtjen nga Diskriminimi”, të ndryshuar. Në këto kushte Komisioneri, filloi procedurat përkatëse për shqyrtimin e saj.

- Me shkresën nr. 32, datë 07.01.2025, Komisioneri për Mbrojtjen nga Diskriminimi, ka njoftuar dhe kërkuar parashtrime nga Ndërmarrja e Shërbimeve Mbështetëse të Arsimit dhe Çerdhes, pranë Bashkisë Korçë, lidhur me pretendimet e subjektit ankues, si dhe ka kërkuar dokumentacionin si më poshtë:
 - Informacion mbi arsyet se përse nuk është pranuar aplikimi/dokumentacioni i paraqitur nga pala ankuese për përfitimin e bursës për vajzën e saj të mitur M.T.
 - Kopje të dosjes të dokumentacionit të dorëzuar nga ankuesja.
 - Informacion nëse fëmija e ankuses (M.T) ka përfituar vitet e kaluara pagesë burse. Nëse po, kopje të aktit/dokumentit provues.
 - Informacion të kategorive sociale, që kanë përfituar bursë gjatë vitit shkollor 2024-2025, nga ana e Bashkisë Korçë, si dhe kopje të dokumentacionit, akteve provuese.

Me shkresën nr. 22, datë 13.01.2025, Ndërmarrja e Shërbimeve Mbështetëse të Arsimit dhe Çerdhes, pranë Bashkisë Korçë ka kthyer përgjigje në lidhje me ankesën, duke parashtruar në mes të tjerash se:

“Znj. M.T ka kërkuar bursë për fëmijët e saj K.T dhe M.T, nxënës në shkollën “Ismail Qemali”. Sipas informacionit nga Drejtoria e shkollës, prindi ka dorëzuar dokumentet për të aplikuar për bursë pranë kësaj drejtorie. Nga shkolla janë pranuar dokumentet dhe janë dorëzuar pranë Ndërmarrjes së Shërbimeve Mbështetëse të Arsimit dhe Çerdhes. Nga ana jonë dokumentacioni

i dorëzuar është pranuar dhe është shqyrtuar së bashku me të gjithë dokumentet e tjera të të gjithë nxënësve që kanë aplikuar për bursë. Nxënësi K.T ka qenë përfitues i bursës për vitin shkollor 2024-2025, bazuar në Vendimin e Këshillit Bashkiak Korçë nr. 160, datë 16.12.2024, sipas kriterit 2.3/c të VKM nr. 666, datë 10.10.2019, i ndryshuar me VKM nr. 511, datë 27.07.2022 ku përcaktohet: “c) Nxënësit, të cilët gëzojnë statusin ligjor të invalidit paraplegjikë dhe tetraplegjikë, si dhe nxënësit me aftësi të kufizuara, të vërtetuar nga komisioni mjekoligjor”.

Nxënësja M.T nuk ka qenë përfituese e bursës për vitin shkollor 2024-2025, pasi me dokumentet që ka dorëzuar për aplikim nuk mund të klasifikohet në asnjë nga kriteret për përfitimin e bursës sipas VKM nr. 666, datë 10.10.2019, i ndryshuar. Znj. M.T pretendon se duhet të përfitojë bursë sipas kriterit 2.3/d, të VKM 666, sepse ka dy prej fëmijëve me aftësi të kufizuara. Saktësojmë këtu që nxënësja M.T nuk është e sëmurë apo me aftësi të kufizuara. Por në këtë pikë përcaktohet shprehimisht: “d) Nxënës fëmijë të personit/personave që gëzojnë statusin e Invalidit” dhe dokumentacioni që kërkohet për të aplikuar për bursë është:

Certifikatë personale; Certifikatë familjare; Vërtetim nga shkolla (për regjistrim, frekuentim të rregullt dhe jo mbetës); Vërtetim mbi statusin e invaliditetit dhe pagesën e pensionit të invaliditetit të prindërve; Vërtetim nga tatimet që ka/nuk ka biznes për çdo person madhor të familjes.

Bazuar në këtë pikë nxënësja M.T nuk mund të jetë përfituese e bursës sipas këtij kriteri, pasi mbështetur në dokumentacionin e dorëzuar pranë nesh, asnjëri nga prindërit nuk gëzon statusin e invalidit.

Nxënësja M.T ka qenë përfituese e bursës për vitin shkollor 2023-2024 bazuar në Vendimin nr. 164, datë 29.12.2023 të Këshillit Bashkiak Korçë sepse vitin e kaluar ka pasur numër më të lartë bursash, pasi një pjesë është mbuluar nga fondet e Bashkisë Korçë dhe në bashkëpunim me shkollën përkatëse janë mbështetur ato familje të cilat kanë qenë në situatë më të vështirë social-ekonomike.

Nuk përbën diskriminim fakti që nxënësja ka qenë fituese e bursës vitin e kaluar dhe këtë vit nuk është sepse shqyrtimi dhe vlerësimi nëse do jetë apo jo fituese për bursën bëhet duke u bazuar në dokumentacionin e dorëzuar në vitin korrent, përkatësisht vitin 2024, dhe jo në vitin e kaluar”.

Subjekti ankues është vënë në dijeni me shkresën e NSHMÇK të Bashkisë Korçë, nëpërmjet specialistes së zyrës së KMD-së në Korçë, por nuk ka kthyer përgjigje.

III. Vlerësimi i fakteve dhe provave të grumbulluara nga Komisioneri gjatë procesit të shqyrtimit të çështjes.

A. Lidhur me me trajtimin e padrejtë, të pabarabartë e të pafavorshëm.

Komisioneri për Mbrojtjen nga Diskriminimi ka marrë në shqyrtim pretendimet e ankueses për trajtimin diskriminues në procedurën e ndjekur për përfitimin e bursës për vajzën e saj, për shkak të aftësisë së kufizuar të dy fëmijëve të tjerë të saj.

Diskriminimi përkufizohet nga ligji 10221/2010 *“Për Mbrojtjen nga Diskriminimi”*, i ndryshuar, në nenin 3, pika 1, si: *“‘Diskriminim’ është çdo dallim, përjashtim, kufizim ose preferencë, bazuar në cilindo shkak të përmendur në nenin 1 të këtij ligji, që ka si qëllim ose pasojë pengesën ose bërjen të pamundur të ushtrimit në të njëjtën mënyrë me të tjerët të të drejtave e lirive themelore të njohura nga Kushtetuta e Republikës së Shqipërisë, aktet ndërkombëtare të ratifikuara nga Republika e Shqipërisë, si dhe nga ligjet në fuqi”*.

Mbështetur në detyrimet ligjore të parashikuara në nenin 3 të Kushtetutës të Republikës së Shqipërisë në të cilën shteti merr masa për mbrojtjen e dinjitetit të njeriut dhe respektimin e lirive dhe të drejtave të tij, nenit 14 të Konventës Evropiane të të Drejtave të Njeriut, ligjin 10021/2010 *“Për Mbrojtjen nga Diskriminimi”*, të ndryshuar, Komisioneri për Mbrojtjen nga Diskriminimi synon respektimin me rigorozitet të parimit të barazisë përpara ligjit, barazi të shanseve dhe mundësive për të ushtruar të drejtat dhe liritë, si dhe zbatimin e efektshëm të politikave antidiskriminuese.

Procedura dhe dokumentacioni i përfitimit të bursës rregullohet sipas përcaktimeve të VKM-së VKM nr. 666, datë 10.10.2019 *“Për kuotat financiare të ushqimit në mensa e konvikte dhe përcaktimin e kriterëve për përfitimin e bursave e të pagesave për nxënësit e arsimit parauniversitar në institucionet arsimore publike”*; të ndryshuar me VKM nr. 511, datë 27.07.2022.

Nga ana e palëve na janë vënë në dispozicion në cilësinë e provës:

- Vërtetim nr. 124, datë 28.10.2024, i Shkollës 9-vjeçare “Ismail Qemali”, Korçë, me anë të të cilit vërtetohet se M.T, është nxënëse e klasës së VI-të pranë kësaj shkolle për vitin shkollor 2024-2025.
- Çertifikatë e gjendjes familjare e datës 23.12.2024.
- Çertifikatë e personale e fëmijës M.T, e datës 08.10.2024.
- Vërtetim nga Drejtoria e Kujdesit Social e Bashkisë Korçë, në të cilin vërtetohet se K.T (vëllai), trajtohet me paaftësi në shumën 8.739 lekë.
- Vërtetim nga Drejtoria e Kujdesit Social e Bashkisë Korçë, në të cilin vërtetohet se K.T (motra), trajtohet me paaftësi në shumën 8.739 lekë.

Sa më sipër, Komisioneri do të shqyrtojë këtë çështje në bazë të shpjegimeve të dhëna nga ankuesja në formularin e ankesës, dokumentacionin shoqërues si dhe informacionit të dhënë nga Bashkia Korçë.

Në këtë kuptim, referuar VKM nr. 666, datë 10.10.2019 *“Për kuotat financiare të ushqimit në mensa e konvikte dhe përcaktimin e kriterëve për përfitimin e bursave e të pagesave për nxënësit e arsimit parauniversitar në institucionet arsimore publike”*; të ndryshuar me VKM nr. 511, datë 27.07.2022, personat që kërkojnë të trajtohen me bursë, duhet të aplikojnë dhe të dorëzojnë

dokumentacionin e kërkuar, pranë Institucioneve Arsimore jo më vonë se muaji tetor dhe pranë Këshillit Bashkiak në fund të muajit dhjetor.

Në pikën 1, të VKM-së sipërcituar, përcaktohet se:

“Nxënësit, të cilët ndjekin studimet në institucionet arsimore publike të arsimit parauniversitar, mund të përfitojnë bursë dhe përfitime të tjera, të parashikuara në këtë vendim nga buxheti vjetor i miratuar për ministrinë përgjegjëse për arsimin dhe ministrinë përgjegjëse për arsimin profesional”.

Në pikën 2, të këtij vendimi përcaktohet se:

“2. Nxënësit, të cilët ndjekin arsimin parauniversitar me kohë të plotë dhe arsimin e mesëm profesional në institucionet arsimore publike, përfitojnë bursë brenda kuotave dhe kritereve, si më poshtë vijon:

2.3 Kriteri joekonomik:

.....

d) nxënësit, fëmijë të personit/personave që gëzojnë statusin e invalidit;

.....

4. Njësitë e vetëqeverisjes vendore, për uljen e nivelit të braktisjes shkollore, për nxënësit që janë regjistruar në arsimin bazë, por, në pamundësi financiare nuk ndjekin arsimimin, miratojnë bursa financiare me përfitues nxënësit, fëmijë të familjeve në nevojë, pas konfirmimit nga mësuesi kujdestar dhe drejtori i shkollës për frekuentimin e procesit mësimor, si dhe nga zyra vendore e arsimit parauniversitar.

5. Njësitë e vetëqeverisjes vendore, për kategorinë e nxënësve që janë regjistruar në arsimin bazë, por, në pamundësi financiare nuk ndjekin arsimin bazë, dhe për uljen e braktisjes shkollore të arsimit bazë, mund të miratojnë dhe të shpërndajnë bursa edhe nga fondet e veta ose nga fondet buxhetore të përfituara në formën e transfertës së pakushtëzuar”.

Referuar provave dhe informacionit të vënë në dispozicion nga palët, si dhe kritereve të përcaktuara në VKM-në sipërcituar, për përfitimin e bursës së fëmijës M.T, bazuar në kriterin joekonomik, do të duhej që statusin e invalidit, (AK) ta gëzonte njëri nga prindërit e saj, dhe jo një familjar tjetër (përveç prindit), siç është në rastin konkret vëllai dhe motra e saj.

Neni 7 i LMD-së², i ndryshuar, në pikën 1 të tij, parashikon se: *“Çdo veprim ose mosveprim i autoriteteve publike ose i personave fizikë a juridikë që marrin pjesë në jetën dhe sektorët publikë apo privatë, që krijojnë baza për mohimin e barazisë ndaj një personi apo grupi personash, ose që i ekspozon ata ndaj një trajtimi të padrejtë dhe jo të barabartë, kur ata ndodhen në rrethana të njëjta ose të ngjashme, në krahasim me persona të tjerë ose grupe të tjera personash, përbën diskriminim”.*

² Shkurtesë për Ligjin për Mbrojtjen nga Diskriminimi, të ndryshuar.

Ligji për mbrojtjen nga diskriminimi ndalon situatat kur persona ose grupe personash në një situatë të njëjtë trajtohen në mënyra të ndryshme, dhe situatat kur personat ose grupet e personave në situata të ndryshme trajtohen njësoj.

Komisioneri vlerëson se, referuar provave të administruara gjatë hetimit të ankesës rezultoi se ankuesja nuk plotëson kriterin për të përfituar sipas legjislacionit të sipërcituar, pasi asnjë nga prindërit e saj nuk gëzon statusin e invalidit.

Sa më sipër, mbështetur në ligjin 10221/2010 “*Për Mbrojtjen nga Diskriminimi*”, të ndryshuar, si dhe nga analizimi në tërësi i fakteve të sipërpërmendura, Komisioneri vlerëson se nxënësja M.T nuk është ekspozuar ndaj një trajtimi të padrejtë dhe të pafavorshëm, nga ana e NSHMAÇ të Bashkisë Korçë.

Komisioneri, vlerëson se për sa më sipër, nuk konstatohet se ka shkelje të ligjit 10221/2020 “*Për Mbrojtjen nga Diskriminimi*”, të ndryshuar, nga ana e NSHMAÇ të Bashkisë Korçë, lidhur me trajtimin e rastit të nxënës M.T, kundër NSHMAÇ të Bashkisë Korçë. Në mungesë të trajtimit të padrejtë dhe të pafavorshëm, Komisioneri gjykon se nuk kemi të bëjmë me diskriminim për shkakun e pretenduar nga ankuesja.

PËR KËTO ARSYE:

Mbështetur në nenet 32 dhe 33, të ligjit 10221/2010 “*Për Mbrojtjen nga Diskriminimi*”, të ndryshuar, Komisioneri për Mbrojtjen nga Diskriminimi,

V E N D O S I:

1. Konstatimin e mosdiskriminimit të nxënës M.T³, për shkak të aftësisë së kufizuar të vëllait dhe motrës, nga ana e Bashkisë Korçë.
2. Kundër këtij vendimi lejohet ankim në Gjykatën Administrative të Shkallës së Parë Tiranë, brenda 45 ditëve nga marrja dijani.

KOMISIONERI

Robert GAJDA

³ Përfaqësuar nga nëna, znj. M.T.